

Ruschein, ils 31 da fanadur 2025

COMMUNICAZIUN A LAS MEDIAS

Il Patg federal è anc oz actual

La cussegliera naziunala Magdalena Martullo-Blocher tegna il pled dal prim d'avust tar la Halla Crestas a Ruschein.

Magdalena Martullo-Blocher, interprendidra da l'EMS-CHEMIE e cussegliera naziunala, ha discurrì en ses pled dal prim d'avust davart l'istorgia millennara da Ruschein. Gia durant il temp da bronz devi culegnas sin la terrassa sulegliva sur la val. A partir dal temp medieval tempriv han differents signurs regì sur da la vita dals purs che stuevan pajar tributs a quels. Pass per pass han ils umans en la regiun cumbatti per lur independenza. Martullo ha clamà en memoria ils artigels da Glion dal 1524 e dal 1526 che han già ina muntada extraordinaria per ils dretgs democratics da la Surselva e la fundaziun dal Stadi liber da las Trais Lias. Ils abitants dal cumin da la Foppa han dentant vulì dapli independenza: il 1538 èn els sa cumprads liber dals dretgs feudals episcopals. Esser libers e decider davart ils agens affars – princips fundamentals ch'eran tant impurtants per ils umans en Surselva sco era per ils confederads sin il Rütli il 1291.

Il Patg federal dal 1291 è anc oz actual. Ils vegls confederads han francà tut l'impurtant sin strusch dapli ch'ina pagina A4: nagin dretg ester, nagins tributs e chastis esters. Il pachet da cunvegns ch'il Cussegl federal haja elavurà cun l'Uniun europeica cumpiglia texts da lescha sin passa 20'000 paginas e cuntradia diametralmain a quai ch'ils antenats hajan vulì, ha Martullo ditg en ses pled. Tenor quel s'obligass la Svizra da surpigliar automaticamain il dretg da l'UE dad oz e da l'avegnir e derschaders esters al tribunal europeic avessan l'ultim pled en chapitel.

La Confederaziun saja anc adina periclitada da la «malizia dal temp». Perquai dovria quai burgaisas e burgais che stettian nà curaschusamain e sa dostian cunter in'avugadia. La Svizra, in pievel da minoritads, giaja gia dapi 734 onns cun success sia via libra ed independenta. Quai funcziunia mo grazia a las soluziuns decentralas e

praticas. «Perquai na festivain nus Svizras e Svizzers era betg a Berna sin la Piazza federala, mabain cuminaivlamain en ils vitgs sco a Ruschein. Gist ils umans en las regiuns muntagnardas sappian dapi tschientaners che libertad muntia era responsabladad. Ins sto sez star nà e prender per mauns las chaussas.»

* * * *